

տեալ էր յերուսաղէմ՝ և սպասէր սունուլ զպատասխանիս դրոցն, զամենայն արարս նոցա դրեալ ծանուցանէր 'ի պատշաճաւոր տեղիս :

Յետ դառնալոյ Հրեայ սեղանաւորաց 'ի Միւզերիսայ 'ի Գամասիոս, գրեցին առ Թէոդորոս Պատրիարք վասն հաշուոյ դրամոց, զոր ոչ ժամանեցին աւարտել զայն ընդ Վարդապետաց . գրեալ է նաեւ Կուսակալն, թէ զհաշիւն մեր կատարեցաք ընդ սեղանաւորաց մերոց եւ զգումար պահանջիցն ամբողջ ընկալաք 'ի նոցանէ, այսուհետեւ հաշիւն ձեր ընդ նոսա է :

Երկոցունց գումարն, այսինքն Գանձապետին եւ Կուսակալին եղեւ 900 քսակ, որոյ հատուցումն եղև կարի դժուարին եւ տաժանելի : Ապա երկար բանիւք գրեաց Թէոդորոս Պատրիարք առ փոխանորդ Պօղոս վարդապետն և առ Ազնաւորեան Կարապետ Ամիրայ և առ այլս . հասանել նոցա և օգնել և փրկել զինքն 'ի տառապանաց, որպէս է տեսանել 'ի նամականիս նորին, զորս աւելորդ էր երկրորդելն աստ (յՑ Հոկտեմբերի) : Գրեալ էր նաեւ Թէոդորոս վասն Պօղոս վարդապետի եւ այլոց ոմանց երթալ 'ի Ս . Էջմիածին և արժանի լինիլ Առաքելական ատիճանի Եպիսկոպոսութեան, սակայն ընդդէմ կացին Ամիրայք այսմ . զի տակաւին չէր 'ի գլուխ ելեալ գործ Երուսաղէմի, և Պօղոս էր 'ի գլուխ գործոյն և թեւակից Իշխանաց, որոյ վասն անյարմար դատեցին տարաժամ մեկնիլ նորա 'ի քաղաքէն, եւ գրեցին առ Պատրիարքն . զի զկնի խաղաղութեամբ աւարտելոյ զգործն, երթիցեն 'ի Ս . Էջմիածին, և Թէոդորոս հաճութեամբ ընկալաւ զխոհական խորհուրդս նոցա : Զայսոսիկ այսպէս ծանուցեալ վերստին դարձցուք 'ի կարգ Պատմութեանս :

Յովհաննէս Պատրիարք Կոստանդինուպօլսոյ էր կարի յոյր և անձնեայ՝ մինչ չզօրել շարժիլ 'ի տեղոջէ իւրմէ առանց օգնականի, եւ յառաւել զօրանալ ծանրութիւն մարմնոյն, նստէր յԱթոս 'ի ժամ Ս . Պատարագին ընթեւնուլ զերկար աղօթս և կատարել զՍ . Խորհուրդն . տեսեալ բազմաց տարօրինակ գործս նորին, հատան 'ի տրտունջ . այլ նա ոչ կամէր անսալ, և մանաւանդ ասէր, թէ հեղինակ Պատարագին 'ի Ս . Վերնատան բազմեալ աւանդեաց